

6 *Copia de una letera di sier Antonio Badoer, di sier Jacomo, texorier in la Patria di Friul, scritta a suo padre. Data in Udene, a dì 28 fevrer 1510, hore 19.*

Scrive dil gran disordine eri intravenuto de li, qual è, che missier Antonio Sovergnan era andato sora la fabrica de Maran, e, partito el fo de qui, missier Alvixe da la Torre e certi altri zenthilomeni haveva soldado parecij fanti. Quello i voleva far non se dize; ma missier Nicolò Sovergnan, fiol di missier Antonio, steva con gran sospeto, digando, i haveva soldado diti fanti per amazarlo, et el dito missier Nicolò scrisse a suo padre, e feze le cosse più de quel che le era. El dito missier Antonio subito montò a cavalo e vene qui in Udene. El dì drio che 'l zonze, l' andò dal locotenente, e disseli, come missier Alvise da la Torre e altri zenthilomeni haveva soldado parecij fanti e che 'l non saveva la causa, e che 'l voleva che el locotenente li fesse mandar via, e che 'l se dubitava che i non l' amazzasse. El logotente feze quelle provixion li fo possibile; per questo missier Antonio non restò de mandar fuora in la villa per vilani, i qua', za do zorni, che fo a dì 25 del mexe, ge vene dentro zercha persone 2000. El dì me lemo el locotenente mandò per missier Antonio Sovergnan e volse i fesse paxe; per la qual paxe el fo gran contrasto de quelli de la parte di missier Antonio, che non voleva el la fesse; pur el locotenente, con quelle bone parole li era possibile a dirli, li dixeva, a tanto li conduse a la paxe. Fo a dì 26, hore 22, che fo conclusa: el dito missier Antonio con el dito missier Alvise, e un missier Texeo da Coloredò, e un sier Sebastiam da Monfalcon e altri zenthilomeni, i qual la feze fra malora e mal ponto, e vegnissemo zoxo de castello tutti insieme. Missier Antonio tolse lizentia e andò a casa. El locotenente, insieme con tutti i altri zenthilomeni, andassemo a casa de madona Maria Sovergnan a veder a balar. Quando i ave compido, per vegnir via, missier Antonio vene dal locotenente e disseli, che i fanti de missier Alvise da la Torre haveva petizà drio i soi famegij, e che la paxe parerave non fosse bona, et là el disse che i feva mal a usar tal termeni; e par anche che, subito fato la paxe, missier Alvise scrivesse a zerti soi parenti da Spilimbergo, come l' aveva fato sta paxe con quel joton de Antonio Sovergnan, e che la dureria puocho, e che i dovesse star aparechiadi et in hordene, chè, quando el bisognarà qualche cossa, subito i serà avixadi. Et il

*I Diarii di M. SANUTO. — Tom. XII.*

par, jeri da matina, in el far del dì, fosse descoverti inimixi fanti da 400, cavalli da 200, et vene lontam di qui mia 4, et stete li fermi. Come el se intese, missier Antonio Sovergnan haveva da 500 vilani, el locotenente subito vene zoso dal castello e feze montar a cavallo el dito missier Antonio con quelli vilani l' haveva, e andò fuora de la terra. I nimici, come i vete zente ussir, parse i tornasse indrio. Da poi vene dentro missier Antonio con tutti li villani, e disse, jera grossi. El locotenente li disse, el dovesse tornar fuora, el qual tornò fin fuora di la porta. Et par mandasse la letera sopradita de qui, el dito missier Alvise, per un suo servidor, a Spilimbergo; et un vilan, con un servidor di missier Antonio, el prese, et trovòl adosso dita letera, e detela a missier Antonio. Et mi con monsignor Marcello andassemo a la volta de dita porta e stessemo un pocho con el dito missier Antonio, el qual ge dete sagramento a tutti do, non dissemo niente, e mostrone la letera; e subito el montò a cavalo, et vene dentro, et andò dal locotenente, e mostroli la letera. El logotenente ge disse: non voja creder, e pregandolo el dovesse soportar; ma el dito missier Antonio se parti e andò a casa. Eri, da poi disnar, a hore 17 in 18, missier Antonio andò in castello dal locotenente, digando el voleva andar a Venexia. In quelle parole, in mancho de un quarto de hora, la terra se messe tutta in arme; el locotenente sentì el rumor, e subito saltò zoso di castello. Missier Antonio non volse vegnir digando, el se dubitava non esser amazado. El locotenente vene a la volta del rumor, a la volta de la cha' de missier Alvise da la Torre, che i l' aveva circondà tutti i villani e altre persone, da 600, in 700; e con schiopeti, balestre et archi i feva gran frachasso, e i ge cazò subito fuogo in la porta. *Tamen* i se di' endeva gaiardamente, e vedeva non poder far niente, l' andò un zenthilomo, qual non vojo menzonar, per bon respeto di primi de qui, a le monizion di Sau Marco e rompete le porte, e tolse 3 falconeti con le balote et polvere, e vene a la volta de la cha' de ditto missier Alvixe, e la comenzò bombardar. Come i vete là i falconeti, i se perse et mesesse in fuga su per i copi, e parte se scose. Come i vete, i non feva pi defexa, intrò dentro e comenzò a sachizar e ruinarla tutta dezeto i muri da le bande, per spazio de hore 5 in 6. Non trovò mai niun de li, e fo preso certi fanti dil dito missier Alvixe, e li voleva amazar, si non ge insegnava dove era diti zenthilomeni, i qual ge i acusò che iera in certe case, e i ge fo drio. Diti poveri zenthilomeni volse-no scampar, a zercha hore una di note; i ge fo drio,